

& Oristan. Propter crebra vadorum brevia & cautes circumquaque insidiosas multa vigilantia opus est eo navigantibus.

Minorum insularum in vicinia Iamaicæ sitarum ingens & incertus est numerus: dividuntur plerumque in Lucayas & Canibales.

Lucayæ Hispaniolæ atque Cubæ ad Septemtriones prætenduntur, & ab illarum maxima atque extrema ad Arctum, appellantur, & in tres classes distinguuntur. Prior comprehendit quæ à Bahama ad ortum, secunda, quas vulgo Oryanas, Martyres & Caios vocant: quæ cum fere scopuli sint & arenosæ, navigantes facile decipiunt, iisque perniciem adferunt: tertia Tortugas. Nulla harum nunc habitatur, indigenis omnibus ab Hispanis alio traductis & ad nihilum redactis. Lucayarum Basama nominatissima est, à qua freto nomen, omnium quæ in novo orbe reperiuntur rapidissimo, quippe fluctus tam pernici cursu inter Floridæ continentem & objecta vada, quæ Mimbres vocant, sese evolvit versus Arctum, ut navigia ventis & velis plena in Meridiem tendentia frustreretur. Fretum hoc patet in latitudinem sexdecim leucas, in longitudinem quinque aut sex supra quadraginta. Guanahani est omnium insularum in novo orbe à Christophoro Columbo inventarum prima, & S. Salvatoris nomine signata: longa est & arboribus opaca, nec dulcium aquarum in mediterraneis inops, gossipii ferax. Lucayoneque aut Yucayoneque harum insularum extrema est, hisque omnibus nomen dedit. Martyres continua insularum aut potius scopulorum est series: nomen hoc sortitæ sunt, quia ex alto prospicientibus homines quasi palis suffixos ostendunt: crebris naufragiis infames sunt. Classibus ex Habana Hispaniam versus solventibus caute & provide hic navigandum. Alias brevitatis ergo omittimus.

Ab Orientali latere insulæ S. Ioannis de Porto Rico, ad Americæ australis continentem usque insulæ minores magno numero sunt, ab indigenarum ingeniis Caribes & Canibales, id est, Anthropophagæ, vulgo nominantur. Harum præcipuæ sunt Anegada vadis cincta, Anguilla insula oblonga, sterili solo & dulcium aquarum expers, salinas habens opportunas, sed modicas. Barbados solum nihil magni promittit. Angli ab anno 1627 coloniam ad hanc deduxerunt, propugnaculum exstruxerunt, & lucos eradicarunt, ad tabaci sementem faciendam: multas quoque arbores fructiferas, aurantias malos, melonesque aliunde importarunt. S. Bartholomæi insula ambitu est satis spatiosa & solo editiori. Beka vel Bekia à nemine incolitur, aqua recente caret & fructibus; sed salinas habet. S. Christophori insula solum habet montibus editum. Superioribus annis Galli & Angli hic sedes fixerunt & incolas om-

nes anthropophagos deleverunt, aut alio migrare compulerunt, operamque dant tobacco ferendo. Deceada Christophoro Columbo secundo ad has partes naviganti occurrit: ad hanc Hispani à Canariis insulis cursus dirigunt. Nuda arboribus est & primo aspectu triremi similis, cuius pars Septemtrionalis conum efficit. Dominica in colles assurgit vallesque profundas demittitur, silvis obductas: sinus commodas aliquot stationes præbent, verum periculosas, propter Caribes, qui hodieque hanc insulam incolunt. Tobaci feracissima est, quam herbam incolæ Europæis, pro cultis, securibus aliisque ferramentis vendunt. Occidentale latus portum habet satis commodum & aquationi è fluviolo peropportunum, Aquadam Hispani vocant. S. Eusthatii insula exigua est, assurgit in conum & è longinquo conspicientibus saccari panis videtur. Granada omnis generis fructuum feracissima est, præcipue cassavi, sinum habet aquandi opportunitate commendatum. Canibales inhabitant. Guadalupen Barbari incolunt, Caribes moribus. Hic classes ex Hispania venientes hodie aquari solent atque in diversa discedere. Insula de Ares periculosa est aquisque vix eminet. S. Lucie sterilis & inhabitata. Marigalante plana & nemorosa. S. Martini insula dulcium aquarum inops à multis incolitur, salinas habet duas minores & unam prægrandem. Martinino tota consurgit in juga, aquamque recentem suppetitat. Montferrate fructus arboreos ex malacia nauseantibus profert. Las Nieves dulcium aquarum torrentibus rigua testudines alit. Ab hac parum distat Rotunda. S. Crux inter arbores fructiferam quandam habet, quæ fructum fert instar pomi viridis, quo manso lingua ita inflatur, ut 24 horarum spatio ejus usus impediatur, nulla in posterum noxa, sponte enim tumor remittit. Aqua palustri, quæ hic abundat, non ante solem exortum faciem lavare cautio est, nam ita intumesceret, ut visum impediret. S. Vincentii insulæ solum est fertile, plures habet sinus & in iis stationes commodas, aquationem & exscensum facilem, animalia pauca, gallinarum, & cancrorum terrestrium copiam. Las Virgines, quarum præcipua Virgo Gorda, insulæ sunt decem aut duodecim, altæ, arboribus vacuæ, aquaque dulci. Magna hic piscium volucrumque abundantia.

Pars Septemtrionis continens in hac tabula est Virginia Australis à Waltero Raleighho anno 1584 detecta, aëris temperie, cœli solique bonitate Septemtrionali par, sed calidior. Varii hic proveniunt fructus, ut maizium, phaseoli, pepones, melones, cucurbitæ, tabacum, cassavium, uvæ majores minoresque, dulces & acidæ, fraga, mori, mali, quercus, Belgicis similes, aliique fructus & arbores Europæis incognitæ.